

六藝之一錄

五十

欽定四庫全書

六藝之一錄卷一百十一

石刻文字八十九

武林石刻

學宮碑錄

宋高宗御書石經

春秋今存三十二碑

尚書今存六碑

易經今存二碑

錢唐倪濤撰

詩經今存十碑

禮記今惟存中庸一碑

論語今存七碑

孟子今存十一碑

右碑高五尺廣三尺餘分四層小楷書字徑三分  
論孟碑字稍大可五分

石經歌

有序

昔宋太宗嘗曰朕退朝觀書外留意字畫雖非帝王

事業不愈游畋聲樂乎迨後

缺

曰寫字當寫書

不惟學字又得經書不忘紹興二年宣示御書孝經  
繼出易詩書春秋左傳論孟及中庸大學學記儒行  
經解五篇總數千萬言刊石太學淳熙中孝宗建閣  
奉安親書扁曰光堯石經之閣新安朱熹修白鹿書  
院奏請大帝石經本是也元初西僧楊璉真伽造塔  
行宮故址取碑石累基杭州路官申屠致遠力爭而  
止後因改學為西湖書院歲久閣廢石經斷折零落

洪武中移仁和學於書院然石經久廢人莫知留意也宣德元年夏予出按於杭觀之慨歎迺以屬郡守盧君玉潤率教官生徒四散收拾得全碑若干碎折若干一一補鑿共得經碑百片舁置殿後及兩廡見者驚嘆因作長歌備載其事云

思陵避敵東南隅臨安建國稱行都投戈講藝事經術六經語孟咸親書字形僅比黃庭小楷法欲與爭先驅宸章赫弈麗霄漢鸞翔鳳翥昭神謨宰臣敷



奏勒琬琰工徒竭蹙爭奔趨琢成豐碑凡二百一一  
摹刻無遺餘身高八尺廣踰半上圓中直安方趺列  
藏成均首善地要令萬世瞻弘模淳熙紹統構傑閣  
覆蓋護惜同璫璵嘗令良工打石本散布學校周寰  
區炎精墮海宋社屋潭潭三舍成榛蕪豪酋楊璉媚  
姦相走舁碑石營浮圖路官申屠力爭止改立書院  
名西湖陵夷百年閣旣毀石經倒折誰匡扶小者堵  
牆布行徑大者顛倒橫溝渠遂令至寶遭污蟻誰復

張眼來睢盱嗟予好古生何晚忝官六察乘輅車仁  
和邑庠偶得見對之不覺成欷歔岐陽之鼓久已沒  
東都石經今亦無俗流愛好蘭亭刻視此何啻天壤  
殊急命郡守集吏卒手舁繩曳來庭除爬抄剔洗去  
垢穢灰黏鐵鈕相聯挈尋行數字共合轅妥置長廊  
寬更舒東西峙立無机隄深簷蓋護何他虞零殘塊  
礫埋殿後免遭賤辱遭泥塗當今聖明御四海嚮用  
經術崇文儒浙江大府列藩臬聖人謨訓當弘敷我

歌石經示來者立言雖鄙良非誣 宣德二年歲在

丁未秋七月朔旦巡按浙江監察御史海虞吳訥識

宋理宗御書道統十三贊

并序

朕獲承祖宗右文之緒祇遙燕謀日奉慈極萬幾餘  
閒博求載籍推迹道統之傳自伏羲迄于孟子凡達  
而在上其道行窮而在下其教明採其大指各為之  
贊雖未能探蹟精微姑以寓其尊所聞之意云爾

右二

碑每碑  
五行



紹定三年所製淳祐改元孟春祇謁

先聖就賜國子監宣示諸生

右一碑四行後空一行鈐連珠小印一長

一寸五分廣八分上鐫辛丑二字下御璽一縱橫各三寸

篆額皇帝御製御書

伏羲

繼天立極 為百王先 法度肇建 道德純全

八卦成文 三墳不傳 無言而化 至治自然

堯

大哉帝堯 盛德巍巍 垂衣而治 光被華夷  
聖神文武 四岳是咨 揖遜之典 萬世仰之

舜

於皇聖德 至孝盡倫 所以為大 樂善取人  
惟精惟一 帝心之純 垂拱無為 堯道是循

禹

克勤于邦 烝民乃粒 厯數在躬 厥中允執  
惡酒好言 九功由立 不伐不矜 振古莫及

湯

順天應人 本乎仁義 以質繼忠 匪曰求異

盤銘一德 桑林六事 人紀肇修 垂千萬世

文王

原缺

武王

受天眷命 繼志前人 遐邇悅服 偃武修文

惟賢是寶 法度彰明 建用皇極 爰叙彝倫

周公

美哉公旦 翼輔成周 施兼四事 才藝俱優  
制禮作樂 惠澤敷流 有大勲勞 宗社延休

孔子

聖哉尼父 秉德在躬 應聘列國 道大莫容  
六藝既作 文教聿崇 今古日月 萬代所宗

顏子

學冠孔門 德行科首 聞一知十 若虛實有  
樂道簞瓢 不易所守 步趨聖師 矐若其後

曾子

守約博施 反躬三省 孝為德先 祿仕不忍  
聖道正傳 意會神領 一唯忠恕 門人深警

子思

閒居請問 世業克昌 可離非道 孜孜力行  
發揮中庸 體用有常 入德樞要 治道權衡

孟子

生稟淑質 教被三遷 博通儒術 氣養浩然

深造自得 亞聖之賢 高揖孔氏 獨得其傳

右碑十六枚俱高五尺廣二尺六寸序三贊十三  
每碑五行大字楷書字徑四寸

元聖旨碑

篆額詔旨 二字平列  
字徑五寸

上天眷命皇帝聖旨蓋聞先孔子而聖者非孔子無



以明後孔子而聖者非孔子無以法所謂祖述堯舜  
憲章文武儀範百王師表萬世者也朕纂承丕緒敬  
仰休風循治古之良規舉追封之盛典加號大成至  
聖文宣王遣使闕里祀以太牢於戲父子之親君臣  
之義永惟聖教之尊天地之大日月之明奚罄名言  
之妙尚資神化祚我皇元主者施行 大德十一年

七月

缺

日

上層隸書十三  
行字徑五寸

惟夫子集羣聖大成垂教萬世雖追崇之典屢臻未

有備其極者皇元大德丁未始加大成之號其所以  
致褒稱之隆蔑以尚矣後二十九年儒學提舉臣余  
謙副使臣陳旅謂明詔之頒它郡學院皆勒諸石而  
茲獨缺焉於是臣謙為隸古書之俾刻樹廟門用揚  
休命昭示于無窮厥惟楹哉 至元二年丙子歲秋  
九月甲子西湖書院山長臣陳泌拜首稽首謹書

右

層楷書十七  
行字徑五分

篆額

西湖書院重修大成殿記

五行字  
徑三寸

西湖書院本故宋太學其初岳武穆王飛之第也歲  
丙子學與社俱廢至元三十年以其左為浙西憲司  
治所其右聖廟在焉三十一年東平徐公琰為肅政  
廉訪使乃即殿宇之舊改建書院置山長員主之先  
是西湖鎖瀾橋北有三賢堂祀唐杭州刺史白文公  
居易宋和靖處士林公逋知杭州事蘇文忠公軾於  
是奉以來祠之元統二年秋大成殿東南角壞葺之  
者不良於謀因盡撤而治之費浮而物竄功未集而